

4

Байқоңырдағы байыпты бастамалар



7

20 мың доллар! Мәһрге қымбат сый сұрау қалыпты ма?



Сыр бойы

27 шілде, сенбі 2024 жыл



www.facebook.com/syrboy.kz

www.instagram.com/syrboy_kz

t.me/syrboy_kz

twitter.com/syrboyi

№114-115 (20788-20789)

Қызылорда облыстық қоғамдық-саяси газет. 1929 жылдың 1 шілдесінен шығады

МӘЖІЛІС

«АУЫЛ АМАНАТЫ»: ИГЛІК ҺӘМ ЕНДІГІ МІНДЕТ

Сыр өңіріне жұмыс сапарымен келген ҚР Премьер-министрінің орынбасары Тамара Дүйсенованың қатысуымен «Ауыл аманаты» жобасын жүзеге асыру және кәсіпкерлікті дамыту мәселелері талқыланған мәжіліс өтті. Жиынға Парламент Сенатының депутаттары Руслан Рүстемов, Наурызбай Байқадамов, Ауыл шаруашылығы вице-министрі Ербол Тасжүреков, Үкімет аппаратының қызметкерлері қатысты.

Сондай-ақ Алматы, Түркістан, Батыс Қазақстан облыстарының кәсіпкерлері тәжірибе алмасу үшін арнайы келді. Мәжіліске «AMANAT» партиясы облыстық филиалы, облыстық басқарма, департамент, инспекция басшылары, қала, аудан әкімдері мен ауыл шаруашылығы, кәсіпкерлік, экономика және қаржы, жұмыспен қамту мекемелерінің басшылары, ауылдық округ және кент әкімдері қатысты.

2-бет

АРМЫСЫҢ, ПАРИЖ ОЛИМПИАДАСЫ!

Кеше әлем халқы асыға күткен 2024 жылғы Париж Олимпиадасы салтанатты түрде ашылды. Қазақстан құрамасының туын Асланбек Шымбергенов пен Ольга Сафронова алып жүрді. Дубірлі дода – қазақстандық спортшылардың тәуелсіз ел ретінде қатысып отырған сегізінші Жазғы Олимпиадасы.



8-бет

САПАР

Тамара Дүйсенова, ҚР Премьер-министрінің орынбасары:

«Өңіраралық байланысты нығайту керек»



ҚР Премьер-министрінің орынбасары Тамара Дүйсенова облысқа жұмыс сапары аясында «Ауыл аманаты» бағдарламасының аймақта жүзеге асу барысымен танысып, ауыл тұрғындарымен кездесті.

Быттыр бағдарлама шеңберінде республикалық бюджеттен 3 млрд теңге қаралып, 406 жобаға несие берілді. Соның арқасында 700-ден астам жұмыс орны құрылды. Несие алғандар жеңіл өнеркәсіпті де игеруде. Мәселен, Махамбетов ауылының тұрғыны Сәрсенгүл Аралбаева «Ауыл аманаты» арқылы қол жеткізген 5 млн теңгеге шұлық өнімдерін шығаратын құрал-жабдықтар сатып алды. Қазір күніне 200-250 дана шұлық сатуда. Жобаға дейін тұрақты табысы болмаған Сәрсенгүл Аралбаева бүгінде жеке кәсіпкер.

– Өнімге деген сұраныс өте жақсы. Енді кәсіпті кеңейту жағын ойластырып отырмын. Өзірге екі адам жұмыс істейміз. Кәсібім кеңейіп жатса, жұмыс орны да көбейеді. Қолдау білдіргендерге алғысым шексіз! – деді ол.

Осы ауылдың тұрғыны Алтынқұл Дүйсенғазиева жүн мен мактадан көрпе тігіп, кәсібін дөңгелентіп отыр. Ол үшін «Ауыл аманаты» жобасы аясында 3 млн теңгеден астам несие алды. Қазір ауыл, ауданнан

бөлек, Астанадан да тапсырыстар келіп, айына 20-25 көрпе тігеді.

– Өзімнің балама да осы кәсіпті үйретудемін. Алғашқыда өтініш бергенде жобамның мақұлданынына сенбедім. Алайда талап қылған адамға жол ашық екеніне көзім жетті. Осындай төмен пайызбен несие беру бастамасын көтерген азаматтарға ризашылығымды білдіремін, – деді ол.

Ал Сырдария ауданының «Айдарлы» ауылында көне кәсіпті жаңғыртқан кәсіпкер бар. Зейнеткер Марияш Әлжанова киіз басып, түкті кілем, сырмақ тігеді. «Ауыл аманаты» жобасы арқылы алған қаржыға цех ашып, 6 адамды жұмыспен қамтуда.

– Ұлттық бұйымдарға сұраныс қашан да жоғары болады. Өндіріске қажетті жүннен тапшылық жоқ. Өзіміздің ауылдан, көршілес «Қоғалықолден» қой мен түйе жүнін аламыз. Кәсіп өз алдына, ең негізгі мақсатым – жастарға ұлттық кол-өнерді таныту, – дейді ол.

Тамара Дүйсенова қолға алынған жобаларды жоғары бағалады. Ауыл

тұрғындарымен кездесу кезінде мемлекеттік қолдау шараларымен таныстырды. Жастарға 2,5 пайызбен ұсынылатын жеңілдетілген несиелер, әлеуметтік жағынан осал топтағы азаматтарға берілетін қайтарымсыз гранттар жайлы айтты.

– «Ауыл аманаты» бағдарлама-

сының негізгі мақсаты – ауыл тұрғындарының табысын арттыру. Мемлекет тарапынан түрлі қолдау шаралары қарастырылған. Ол туралы ауыл әкімдері түсіндіру жұмыстарын күшейтуі қажет, – деді Тамара Дүйсенова.

3-бет



ЕЛ ЖАҢАЛЫҚТАРЫ

Көшпенділер ойындары: Билет бағасы қанша?

24.kz-тің хабарлауынша, Көшпенділер ойындарында болатын спорт жарыстарына кіру құны айқындалып отыр.

Мәселен, қазақ күресі сайысына билеттер таңертең 2,5 мың теңгеден, кешке 5000 теңгеден басталады. Садақ атушылар жарысына билетті таңғы уақытта 600 теңгеден, кешке 1000 теңгеден алып көруге болады. Ал асық ату мен арқан тартыстан таңғы бәсекеге билет бағасы 700 теңгеден басталса, кешке 1000 теңгеден жоғары есептелмек.



«Пәтер құны өспесе, түспейді»

Өнеркәсіп және құрылыс министрлігі Құрылыс және тұрғын үй-коммуналдық шаруашылық істері комитетінің төрағасы Бақытжан Жүнісбеков пәтер бағасы туралы болжамын айтты деп хабарлайды «ҚазАқпарат».

– Бұл жерде пәтер бағасының күрт түскені байқалмағанына сендіре аламын. Өйткені инфляция басына бағасына қалай да әсер етеді. 2024 жылдың алғашқы жартысындағы қорытынды бойынша қолданысқа беріліп жатқан баспана ауданының өсу тенденциясы бар. Құрылыс шығындарының орташа статистикасы да 2-3 пайыз көлемінде өсті. Дейтұрғанмен, жасалған мәмілелер саны төмендеген. Біз пәтер құнының түсуін дәл осы мәмілелердің азаюымен байланыстырамыз. Жалпы пәтер бағасының күрт өсуін немесе күрт түсуін күтіп отырған жоқпыз. Біртіндеп өсе береді деген болжам бар, – деді ол Орталық коммуникациялар қызметінде өткен баспасөз мәслихатында.



Туризм және бір жыл

Мемлекеттік кірістер комитетінің деректері бойынша өткен жылдың қорытындысымен ресми тіркелген турагенттіктер мен туроператорлардан бюджетке түсетін салықтық түсімдер 14,3 млрд теңге болған. Бұл туралы Туризм және спорт министрлігі «ҚазАқпарат» сауалына жолдаған жауабында мәлімдеді.

Ведомство мәліметінде былтыр елге 9,2 млн қонақ келгені айтылады. Алайда соның тек 1,1 миллионы қонақүй қызметін пайдаланған.

«Ұлттық статистика бюросының деректеріне сәйкес, өткен жылдың қорытындысы бойынша Қазақстанға 9,2 миллионнан астам шетелдік қонақ келді. Оның ішінде 1,1 миллионға жуығы отандық орналастыру орындарында (қонақ үйлерде) қызмет алған. Бұл ретте Ұлттық банктің деректеріне сәйкес, «Сапарлар» бабы бойынша қызметтер экспорты 2,3 млрд АҚШ доллары болды. Бұл көрсеткіш Қазақстанда шетелдік келушілер сатып алған тауарлар мен қызметтерді қамтиды» делінген ведомство жауабында.

«СБ» ақпарат

Валюта бағамы \$ 474,83 kzt

€ 515,38 kzt

₺ 5,5 kzt

Ауа райы

+32° +34°

+30° +32°

Тамара Дүйсенова, ҚР Премьер-министрінің орынбасары:

«Өңіраралық байланысты нығайту керек»

ҚР Премьер-министрінің орынбасары Тамара Дүйсенованың облысқа жұмыс сапары Қазалы ауданында жалғасты.

«Ауыл аманаты» жобасы шеңберінде Салтанат Ражатова 8,6 млн теңге несиеленіп, жылыжай өсіруді қолға алған. Былтыр басталған кәсіп алғашқы жемісін бере бастады. 160 шаршы метр аумаққа қияр егіліп, 800 келі өнім жиналған.

– Отбасымызбен осы жылыжай жұмысын жүргізе бастадық. Әзірге нәтиже жаман емес деп санаймын. Өнімге сұраныс бар. Кәсіпкер үшін маңыздысы – осы. «Ауыл аманаты» бойынша берілетін несиелер шарттары өте тиімді. Тек еңбек етуге ниет болуы керек, – дейді ол.

Ауданда ауыл шаруашылығынан өзге бағытты таңдағандар да бар. Толқын Бижанова алғашқыда кондитерлік өнімдерді үйден әзірлеп, ауылдастарының тапсырысы бойынша жұмыс істеп келген. «Ауыл аманаты» жобасы туралы естіп, кәсібін кеңейтіп, цех ашуды ұйғарған. 6,5 млн теңге жеңілдетілген несиенің арқасында мақсаты орындалып, 4 адамды жұмыспен қамтуда.

Ал Ғалия Қартабаева – аудандағы жас кәсіпкер. «Ауыл аманаты» бағдарламасына ер азаматтарға тән жұмыс

болса да жоба ұсынған. 5,4 млн теңге несиеленіп, автокөлік жөндеу және жуу орталығын ұйымдастырған. Қазір онда екі адам жұмыспен қамтылған.

«Еңбек етуге ниет бар адам кез келген кәсіпті қымысынбай қолға алуы керек» дейді Ғалия Қартабаева.

Қазалыда түйе ұстайтын шаруалар баршылық. Алайда сүті сауылған күйі сатылуда. Оны терең өңдеуге қатысты кеңес берер, қажет болса, үйретер жандар бар. Мысалы, Алматы облысындағы «Дәулет Бекет» ауыл шаруашылығы кәсіпорны шұбаттан бірнеше өнім әзірлейді. Тіпті сусынның ұнтақталған түрін ұсынуда.

Аймақ тұрғындарымен, аудан, ауыл әкімдерімен кездескен вице-премьер ауылдарда кооперативке бірігу тәжірибесін кеңінен қолдану қажеттігін атап өтті. Елімізде 3-4 адам емес, бір шаруашылық аясында бүтін ауыл болып жұмылуы мысалдары бар. Мәселен, Батыстағы «Қоскөл» ауылы. Елді мекендегі барлық 227 ауланың басын қосқан серіктестік тәжірибесі туралы ауыл әкімі Әділет Мұсағалиев айтып берді.

Ал өндірілген өнімді қалаға жаратудың бір жолы ретінде Түркістан облысының тәжірибесі ұсынылды.



Мұнда кәсіпкер Данияр Қалымбетов мемлекеттік-жекеменшік әріптестік аясында аймақтағы әлеуметтік нысандардың асханаларын жөндеп, оларды азық-түлікпен қамту ісін қолға алған. Мектеп-интернаттар, медициналық әлеуметтік нысандарға қызмет көрсетуде. Тағамға қажетті өнімдерді орталықтандырылған жолмен сатып алып, мекемелерді қамтамасыз етеді. Аталған тәжірибе Сыр өңірінде де

енгізілуі мүмкін. Осы ретте «Байқоңыр» әлеуметтік-кәсіпкерлік корпорацияның көмегі қажет. Шаруалардан сатып алынған көкөніс, ет, сүт өнімдері әлеуметтік нысандар асханаларының қажетіне жарайтын болады.

Тамара Дүйсенова елдегі оң тәжірибелерді кеңінен тарату, өңіраралық байланысты нығайтудың маңызды екенін атап өтті. – Әр облыстың, әрине, өзіндік

ерекшеліктері бар. Алайда өзара байланыс арқылы бірлесіп, жетістікке жетуге болары даусыз. Сайып келгенде, бұл азаматтарымыздың тұрмысын жақсартуға елеулі әсер етеді. Әр азаматтың, отбасының бақатты болуы мемлекетіміздің тұрақтылығының кепілі екенін естен шығармайық, – деп атап өтті Тамара Дүйсенова.

Облыс әкімінің баспасөз қызметі



ГАЗ ТАПШЫЛЫҒЫ МӘСЕЛЕСІ ТАМЫЗДА ШЕШІЛЕДІ

Қызылордада бірнеше күннен бері автогаз тапшы. Жанар-жағармай құю бекеттерінің алдында арзан отынды күтіп, қаңтарылған көлік егелерінің көңілі күпті. Өйткені газ тек талонмен беріліп жатыр. Аймақта қалыптасқан ахуалға орай облыс әкімінің орынбасары Ардақ Зебешев түсінік берді.

Белгілі болғандай, бұл Қызылорда облысында ғана емес, еліміздің барлық өңірінде байқалып отыр. Республика бойынша мұнай газының тапшылығы 20-25 пайызға жеткен. Энергетика министрлігі мұның себебін сұйытылған газ пайдаланатын көлік санының артуымен (2022 жылы – 491 мың, 2023 жылы – 582 мың) байланыстырады. Өңірде де өсімді байқау қиын емес. Облыстық полиция департаментіне тіркелген газбен жүретін көлік саны 2021 жылы 4528 болса, 2022 жылы 7290, 2023 жылы 29828, быыл 6 айда 33908-ге жеткен. Демек, 2022 жылдан бері 4 есе артты.

– Облыста 210 газ құю бекеті, 6 газ сақтау қоймасы арқылы 25 оператор газ сатумен айналысуда. Сұйытылған мұнай газының бөлінісі Энергетика министрлігі бекіткен қағидаға сәйкес жүргізілуде. Өңір бойынша газдың бір айдағы қажеттілігі – 9 мың (күніне – 300) тонна. Шілде айына 7406 тонна газ бөлінді, тамыз айына – 7682, қыркүйек айына – 6680 тонна. Осыған орай кейбір жергілікті операторлар газды лимит арқылы сатуға мәжбүр. Дегенмен, облыстағы негізгі ірі операторларда газ саудасы тоқтаған жоқ, – деді облыс әкімінің орынбасары А.Зебешев.

Әкімдіктің мәліметіне сүйенсек, газ толтыру станциялары мен зауытта 1558 тонна газ қалдығы бар. Операторлар оны кестеге сәйкес тасымалдауда. – Газ қорына күнделікті мониторинг

жүргізіледі. Энергетика министрлігімен бірлесе атқарылған жұмыс нәтижесінде облысқа 570 тонна қосымша газ бөлінетін болды, – деді Ардақ Зебешев.

Еске салсақ, шілдеден бастап елімізде сұйытылған мұнай газының бағасы қымбаттады. Өңірде шекті бөлшек саудадағы бағасы литріне – 70 теңге, облыс орталығынан 200 шақырымнан әрі аудандарда – 75 теңге. Тұтынушылар үшін баға 9 пайызға, ал газ желісі ұйымдары үшін газ өңдеу зауыттарынан сатып алу бағасы 12 пайызға өсті.

– Мысалы, министрліктің бұйрығына сәйкес кейбір шекаралас облыстарда бізден қымбат. Шекаралас облыстардағы газ тапшылығына байланысты өңірімізде сұйытылған мұнай газымен қамтамасыз етуде қиындықтар туындады. Сондықтан өңірде бөлінген газды басқа облыстарға тасымалдау жағдайларын болдырмау үшін шекараға арнайы бекеттер қойылды, – деді облыс әкімінің орынбасары.

Сонымен қатар облыс шекарасына жақын аудандарда газ сатылуына лимит орнатылды. Әр автокөлікке – 2000 теңге/29 литр. Облыс әкімдігі көлік егелерін алаңдатқан ахуал тамыз айының басында қалыпқа келетінін, мәселе аймақ басшысының тұрақты бақылауында екенін атап өтті.

Назерке САНИЯЗОВА, «Сыр бойы»



Фото: Аймақ дерекөзден

«МЫҢ БАЛА» СПОРТ КЕШЕНІ АШЫЛДЫ


Кеше Қызылорда қаласының әкімі Серік Қожаниязов «Ақмешіт» шағын ауданында «Мың бала» спорт кешенінің салтанатты ашылу рәсіміне қатысты.



Шаһар басшысы тұрғындарды жаңа нысанның ашылуымен құттықтады. Бұл туралы қала әкімдігінің әлеуметтік желідегі парақшасында жарияланды. – Қызылорда – өркенді өзгерістер мен жаңа жобалар қанат жайған мерейлі мекен. Президентіміздің, Үкіметтің қолдауымен және облыс әкімінің үйлестіруінің арқасында қаламызда тұрғындарымыздың өмір сүру сапасын арттыруға бағытталған бастамалар сәтті жүзеге асуда. Халықтың игілігі, балалардың кемел келешегі үшін заманға сай әлеуметтік нысандар құрылысы қарқынды жүруде.

Озықойлы ұлт қалыптастыруда балаларымыздың білімді, салауатты, адал азамат болуы үшін барлық жағдай жасалуда. Оның дәлелі, облыс орталығында «Шығармашылық академиясы», «Оқушылар сарайы», физика-математика бағытындағы мектеп-интернат, музыкалық колледж және «Жайлы мектептер» салынууда. Бұл өскелең ұрпақтың бойына ұлттық құндылықтары-

мызды сіңірудегі ауқымды шаралар деп түсіну керек.



Облыс әкімі Нұрлыбек Машбекұлының ұйымдастыруымен қаламызда заманауи спорт нысандары бой көтеруде. Быыл қаламызда үстел теннисі орталығы, халықаралық талаптарға сай 10 000 орындық жаңа стадионның құрылысы қарқынды жүруде. Халықты бұқаралық спортқа баулуға бағытталған игілікті

істердің жағасы ретінде 30 000 баланы спорттық үйірмелермен қамтуға мүмкіндік беретін көпбейінді «Қызылорда Арена» спорт кешені салынады.

Бүгін Франция елінде бүкіл әлем көз тіккен байрақты бәсеке – XXXIII Жазғы Олимпиада ойындары басталады.

Дүбірлі долаға қаламыздың 4 спортшысы: Қамшыбек Қоңқабаев, Айдоос Сұлтанғали, Жұбаназар Абылайхан, Шархан Нұрлыхан қатысып, ел намысын қорғайды. Спортшыларымыздың жеңіс тұғырынан көрінуіне тілектестік білдіреміз, – деді Серік Салауатұлы.

Спорт кешенін салған «Абай-Дәулет» серіктестігінің басшысы Мұрат Абайұлы Сәрсенбаевқа қала тұрғындары атынан алғыс білдірді.

Құны 500 млн теңгені құрайтын «Мың бала» спорт кешенінің жалпы ауданы – 5000 шаршы метр. Мұнда бокс, кикбокс, таэквондо, дзюдо, самбо, қазакша күрес, грек-рим күресі, волейбол,

баскетбол, футбол, ұлттық би, ұлттық садақ ату спорт түрлерінен 1000-нан аса бала өз шеберліктерін шыңдайтын болады. Бұл кешен «Ақмешіт» шағын ауданындағы М.Саламатов көшесінің бойында орналасқан.

«СБ» ақпарат

